



Broj: 04/5-03/11-05-1-609/18  
Sarajevo, 24. 4. 2018.

**PREDMET: Posjeta članova Komiteta za odbranu i sigurnost i Potkomiteta za odbrambene sposobnosti i budućnost sigurnosti Parlamentarne skupštine NATO-a, Sarajevo, 16. i 17. 4. 2018. godine**

Članovi Komiteta za odbranu i sigurnost i Potkomiteta za odbrambene sposobnosti i budućnost sigurnosti Parlamentarne skupštine NATO-a (PSNATO) razgovarali su 16. 4. 2018. s članovima kolegija oba doma Parlamentarne skupštine BiH, članovima Zajedničke komisije za odbranu i sigurnost BiH kao i članovima Delegacija PSBiH u PSNATO-a koji su bili i domaćini njihove dvodnevne posjete Bosni i Hercegovini.

Sastanku su prisustvovali: Nikola Lovrinović, predsjedavajući, i Asim Sarajlić, član Delegacije PSBiH u PSNATO-a, Šefik Džaferović i Borjana Krišto, zamjenici predsjedavajućeg Predstavničkog doma PSBiH, Safet Softić i Bariša Čolak, zamjenici predsjedavajućeg Doma naroda PSBiH, Sifet Podžić, predsjedavajući, i Šemsudin Mehmedović, član Zajedničke komisije za odbranu i sigurnost BiH, kao i Boško Šiljegović, parlamentarni vojni povjerenik BiH.

Cilj posjete bio je da se s ključnim političkim akterima u BiH razgovara o aktuelnoj političkoj i sigurnosnoj situaciji u našoj zemlji, zatim da se sagleda stanje u sektoru odbrane i sigurnosti BiH kao i status procesa evropskih i euroatlantskih integracija. Tokom dvodnevnih razgovora gosti su imali priliku da se upoznaju sa spektrom viđenja aktuelnog trenutka naše zemlje i njenog puta ka članstvu u NATO-u.

Šef Delegacije PSBiH u PSNATO-a Nikola Lovrinović istaknuo je da ne treba kriti da se stavovi o pristupanju BiH NATO alijansi razlikuju u Federaciji BiH i Republici Srpskoj, ali da to ne znači da se na njihovom približavanju ne može raditi kao i da su takva razilaženja prisutna i kada je posrijedi Akcioni plan za članstvo (MAP) te postizanje željenih visokih standarda. Zbog činjenice da je zbog nerješavanja uknjižbe vojne imovine na Bosnu i Hercegovinu naš put ka MAP-u u osmogodišnjem zastoju, Lovrinović je dodao da bi bilo dobro da se razmisli o preformuliranju zahtjeva na način da se problem imovine sukcesivno rješava nakon ulaska naše zemlje u MAP.

I predsjedavajući Zajedničke komisije za odbranu i sigurnost BiH Sifet Podžić istaknuo je da je trenutak da s našim partnerima iz NATO-a redefiniira zaključak u vezi s preduslovima za aktiviranje MAP-a i da uvidom u realnost na terenu konstatiramo da je proces uknjiženja vojne imovine krenuo te da ćemo primjenom MAP-a doći do željenog cilja.

Podžić je dodao da bi aktiviranjem MAP-a za Bosnu i Hercegovinu NATO poslao snažnu poruku o našim dosadašnjim naporima i činjenici da proces više ne može stajati.

Na pitanje predstavnika delegacije PSNATO-a šta NATO može učiniti kako bi se naša zemlja približila MAP-u i dalje napredovala na tom putu, zamjenik predsjedavajućeg Predstavničkog doma Šefik Džaferović je tokom sastanka, između ostalog, zatražio da ova alijansa ostane privržena Bosni i Hercegovini i njenom putu ka NATO-u, jer je to članstvo bitan faktor sigurnosti i za BiH i za širi region. On je pri tome podsjetio na to da se radi o ispunjenju strateškog opredjeljenja naše zemlje

koje je bespogovorno prihvaćeno i utvrđeno kao sastavni dio uspješno provedene reforme Oružanih snaga BiH.

Članovi Komiteta za odbranu i sigurnost i Potkomiteta za odbrambene sposobnosti i budućnost sigurnosti Parlamentarne skupštine NATO-a tokom radne posjete Bosni Hercegovini imali su niz susreta s najvišim zvaničnicima Ministarstva odbrane BiH, Ministarstva sigurnosti BiH, Zajedničkog štaba OS, predstavnicima akademske zajednice i nevladinog sektora kao i komandantima Štaba NATO-a u Sarajevu i EUFOR-a za BiH.

Sastancima s gostima iz PSNATO-a prisustvovali su: Marina Pendeš, ministrica, i Boris Jerinić, zamjenik ministra odbrane BiH, general-major Senad Mašović, načelnik, Ivica Jerkić i Gojko Knežević, zamjenici načelnika Zajedničkog štaba OSBiH, članovi Komisije za NATO integracijski proces BiH na čelu s Mijom Krešićem, zamjenikom predsjedavajućeg.

Drugod dana radne posjete Bosni i Hercegovini, 17. 4. 2018, predsjedavajući Delegacije Parlamentarne skupštine BiH u Parlamentarnoj skupštini NATO-a Nikola Lovrinović i član Delegacije Asim Sarajlić, zajedno sa članovima Komiteta za odbranu i sigurnost i Potkomiteta za odbrambene sposobnosti i budućnost sigurnosti PSNATO-a, posjetili su sjedište Državne agencije za istrage i zaštitu (SIPA).

Tokom sastanka, kojem su prisustvovali ministar sigurnosti BiH Dragan Mektić i njegov zamjenik Mijo Krešić, direktor SIPA-e Perica Stanić, direktor Direkcije za koordinaciju policijskih tijela BiH Mirsad Vilić, direktor Granične policije Zoran Galić i direktor Službe za poslove sa strancima Slobodan Ujić, razgovaralo se o aktuelnom stanju sigurnosti u Bosni i Hercegovini i spremnosti policijskih agencija i Ministarstva sigurnosti BiH da se koordinirano suprotstave aktuelnim sigurnosnim izazovima.

Nakon razgovora u sjedištu SIPA-e, zvaničnici PSBiH i PSNATO-a obišli su Jedinicu za specijalnu podršku SIPA-e. Prezentirane su im mogućnosti i spremnost jedinice u izvršavanju zadataka i misije koju imaju, a izvedena je i pokazna vježba.

Predsjedavajući Delegacije  
**Nikola Lovrinović**